

毘陵集

三

毘陵集卷第十一

朝散大夫使持節常州諸軍事守常州刺史賜紫金魚袋獨孤及

墓誌墓表中

九首

唐故正議大夫右散騎常侍贈禮部尚書李公

墓誌銘

并序

唐故祕書監贈禮部尚書姚公墓誌銘

并序

唐故特進太子少保鄭國李公墓誌銘

并序

唐故朝散大夫中書舍人祕書少監頓丘李公

墓誌

唐故給事中贈吏部侍郎蕭公墓誌銘

并序

唐故銀青光祿大夫太子左庶子嚴公墓誌銘

并序

唐故尚書庫部郎中滎陽鄭公墓誌銘

并序

唐故吏部郎中贈給事中韋公墓誌銘

并序

唐故河南府法曹參軍張公墓表

唐故正議大夫右散騎常侍贈禮部尚書李公墓

誌銘

并序

歲在丁未七月丁卯有唐故右散騎常侍李季卿薨享年五十九文經邦國行滿天下無人非鬼責之悔以近後劇無中人十金之產以補祭於身沒顧謂宗子家老

必以巾車一乘斂手足形還葬其孤馮翊縣令霸一作伯

等泣奉遺命以某月庚寅附宅兆於長安九陣原之先塋名公上士護喪會葬同道必至哀纏都邑初公烈考曰適神龍中歷官中書舍人昭文館學士工部侍郎才高而明爲文章著龜公生而好學地使然也豁然閎達天所縱也臨大節而賈勇不私其身也進賢不進不止事君以忠也當昔天步方艱王師有征公入參諫臣出佐軍政直躬咨諏戎臣賴之其後領二曹判二州再司王言三貳京尹由祕書少監爲吏部侍郎復兼御史大夫慰撫山東淮南明年勞旋典選如故大歷三年拜右

常侍其勤王家十有餘年舉措由道行止以直居貞守
忠愆不能惑思賢求才若渴若飢推心吐誠親疎以之
執德之經不爲利回正進退於忠信視得喪如涕洟凡
君子在位則不仁者遠攸徂之邦宜皆蒙福遽奪公算
是不惠於斯人也天難忱斯嗚呼哀哉諸公以爲不可
柰何者壽天之數若奮揚景行宜在知己由是尙書右
丞長樂賈至作銘曰

於維李公誕靈中和磊落瓌奇如山如河胷中洞開萬
里長波孝友忠信詩之無邪早歲登科以文從吏累擢
大邑拔乎其萃時之方難朝慎名器帝曰忠讜爾居諫

議出典方岳入趨禮闈再掌絲綸翱翔鳳池乃作天官
又侍紫微八使澄清功濟危時謬謬正言有犯無隱諉
諧善謔託諷脣吻雲衢未窮陰霜夙實悽愴東川古來
共盡人懷遺愛帝念謀猷衷贈春官悲感林丘已矣平
生哀哉若浮獨有令名與天悠悠

唐故祕書監贈禮部尚書姚公墓誌銘

并序

有唐祕書監永安縣侯姚公諱子彥

本作彥據英華改

字伯英

其先馮翊蓮勺人也至高祖僧洪徙家河東祖思聰祕

書少監父坦汝州梁縣丞贈祕書監公

英華無公字

忠諒孝

愛寬仁愿恭質方氣沖天所授也而力行博學溫故知

新錯綜六藝公作詞賦初舉進士又舉詞藻皆升甲科

尉清苑

英華作遠

獲嘉永寧三縣開元二十九年詔立黃老

學親問奧義對策者五百餘人公與今相國河南元公

載及廣平宋少貞等十人以條奏精辯才冠等列授右

拾遺內供奉歷左補闕於時

英華作當是時

天下無金革之虞

七字據英華補

選多士命百官先文行而後名法

英華作吏事

而柱

下方書南宮章奏主張綸翰典司禮文

英華作樂

尤精其選

非盛名莫居繇是遷公殿中侍御史禮部員外郎禮部

郎中知制誥中書舍人太常少卿天寶十四年奉詔宣

慰江東淮南覽觀風俗無何二京陷覆太夫人捐館公

外罹憂患內纏惛疾銜憤泣血毀鄰

英華作瘡

滅性乘輿反

正公適外除拜太子右

英華作左

庶子於時迪難始康百揆

草創官復其職人亦求舊俄又授公中書舍人禮部侍

郎光祿卿左散騎常侍加銀青光祿大夫復知制誥廣

德二年授祕書監以儒行懿德策名三朝遺跡故事周

遍臺閣

自以儒行至臺閣十七字英華作策名事君二十有七年文學一紀羽儀三朝凡六蹈瑣闥三

掌訓誥四居禮官一典祕書其遺塵餘跡周徧臺閣言行事業著於天下

資忠體和唯道是

居正身奉上中立不倚恐懼戒慎形於隱微故遭值傾

否出入夷險而未嘗有悔名與身偕德善

英華作中庸

是依

明哲以保故也享壽七十有八大歷三

英華作二

年四月某

日薨於位五月某日詔贈禮部尙書知言者以爲壽富
康寧攸好德考終命洪範謂之嚮用五福而公居四焉
以清儉貽厥子孫故所不至者富焉爾非明德介祉何
以享茲有子曰驍曰驥曰驂曰駟英華作駟曰驢號于英華作呼
昊天痛欲報之罔極也銜恤問禮拔血裹事十月丁酉
卜兆此原惟盛德與公器若川流之無還垂芳如之何

刻銘

英華作石

墓門其辭云

英華作曰

恂恂祕書蘊粹含和服膺孔門行鄰

英華作登

四科遭時之

康天下尙文公奮羽翰翱翔慶雲晚逢中興貴德尙齒
公秉懿範入作卿士逮事三后出入二紀典禮司書媚

於天子居貞保儉與祿終始鬱鬱佳城烈烈餘美

英華作光

烈遺美

日月有逝令問無

英華作不己

唐故特進太子少保鄭國李公墓誌銘

并序

少保諱遵皇唐太祖景帝七世孫也祖瑜鄭州刺史追贈太常卿烈考曰暈官至太僕贈太子太師揚州都督公聰朗奇偉豪邁曠達率性忠孝臨節有勇開元十年初仕天寶六年出守始於淄川歷濟南汝南以剛明蒞衆所居政肅民受其賜生爲立祠十四年秋九月由執金吾爲彭原郡守明年長安覆沒元宗遜於南京便橋之役我師敗績自新平屬之五原二千石皆反爲賊守

肅宗以餘騎十數次於彭原公頓首迎謁且憤且喜因獻衣服鞍馬泣問大計乃悉發倉庫募敢死士獲九百人公自誓衆扈蹕而北翌日師次臨涇又北至於平原收攜貳逆命者斬之以殉破其餘黨進幸靈武旬日衆至數萬王師遂張於時法駕播越神器無主公與裴冕等率羣臣勸進陳天意上尊號上卽皇帝位拜公尙書工部侍郎領宗正卿乘輿南旋公封鄭伯舊京始復公典營建社稷宗廟園陵壇墀罔不畢修百工咸若乾元二年論功行封策爲鄭國公定食實封二百戶加特進工部尙書宗正如故上每拜公相命將帥建妃后公悉

參焉渥澤滂沲羔雁盈門家有陸生之橐樂兼魏絳之
賜中興宗臣荷寵無二會李輔國泄省中語且諷公卿
舉己爲相公不從密陳其姦明年肅宗崩公由太子少
傅貶袁州刺史竟爲盜憎且讒勝故也寶應二年拜鴻
臚尋復加太子少保貶永州司馬大歷二年七月某日
薨於永州春秋若干夫人盧氏蘄春郡長史諭之子以
副筭宜室封范陽郡夫人而偕老懋願先公十二歲而
歿大歷三年夏五月庚申合葬於萬安山北原禮也惟
公宣力殷憂之際克扶艱難之業忘身衛上忠之至者
及居職任事知無不爲永泰之後以列侯朝請則放志

達生以親其身再處左官皆非其罪知公者謂公進因
策勲退不附邪善無近名直而忘懷斯可謂之達矣有
四子謂誦諲謬願書其先人之勲烈使後嗣得酌而觀
之於是公母弟祕書少監日勛謂及忝佐典三禮宜知
先王先公之昭穆故命爲誌其辭曰

貞松之姿匪寒不知公之清規見於國危抗憤忠勤發
民濟師戮力扶義天步乃夷奄有滎波遂荒鄭封帝曰
俞往汝作共工澤流於家慶積恩重門羅軒蓋賜有歌
鐘再謫湘源謂當後笑遂遊岱宗天實不弔寂寞舊館
悽涼江徼琢石泉戶攜其光曜

唐故朝散大夫中書舍人祕書少監頓丘李公墓誌

公諱誠字元成魏郡頓丘人也九代祖誕魏太傅陳留郡王從太傅七葉生左威衛將軍翊威衛生汾州長史昇長史生濮陽令諒濮陽生公四歲知禮七歲善屬文十六戶部尙書姚珽以賢良薦比之終賈開元三年舉進士十年舉茂才十七年舉文學皆射策取甲科由太平尉爲金吾曹監察御史河南司錄美原令膳部員外郎天寶元年考功郎中知制誥修國史二年中書舍人五年祕書少監七年十二月終於京師自初仕至終二

十七年歷官十享壽五十三動靜由禮交不諂瀆宏毅
貞亮直而不肆居官必忠執事必敬未嘗以悔吝改操
爲權倖屈法由是自御史爲河南府司錄持正不阿故
也宰美陽周月收案大猾除其根株然後布政及朞而
美陽無訟乃有涸泉湧流白雀馴於庭開元中蠻夷來
格天下無事搢紳聞達之路唯文章先公以俊造文賦
皆第一京師人傳寫策橐相示以爲式無何司言載筆
乃典祕書公才盛名與職位俱論者謂公以文學政事
取公器如拾芥雖不至公卿其令問令望足遺後昆夫
人孝義縣君宋氏萊州司馬元同之女禮樂風操家之

範也柔明孝慈天之質也清淨厭離修之惠也能修采蘋之職以正家節李氏之閨門肅九族睦實夫人是賴乾元元年隨長女從夫子洋州二年正月二十五日終於某居享年五十七遂權窆焉路難不克反葬故也有才子二人曰興曰殷悉能荷先大夫之德興三十爲左補闕起居舍人殷舉秀才甲科永泰二年興請命於上迎夫人喪至自洋州十月二十七日合祔於澠池先塋夫唯天地能長且久若邱隴陵谷則無不遷者也故纂其先人之景行勒於石以爲志

唐故給事中贈吏部侍郎蕭公墓誌銘

并序

公諱直字正仲梁長沙王懿七代孫有唐御史中丞臨汝郡守諒之孟子聰秀英達忠敏孝敬志强體和才方而圓果於從政當斷不惑有妙用明識足以濟衆利物與朋友然諾見於一貴一賤之際十歲能屬文工書十三遊上庠十七舉明經上第名冠太學二十餘以書記參朔方軍事中丞府君之遇讒謫居也公亦播遷漢東移尉穀熟至德二年乃由廷尉評授監察御史歷河南府戶曹京兆府司錄參軍其後驟升尙書戶部庫部司勲吏部四曹郎自殿中進兼侍御史中丞徐州刺史廣德元年中一歲四遷更七職朝廷難奉使之選謂非公